

Gweithgaredd 2: Addysg merched ym Mhacistan

Amcanion dysgu

- Adnabod y rhwystrau i addysg sy'n wynebu plant ym Mhacistan, a gwahaniaethu rhwng y rhwystrau a wynebir gan ferched a bechgyn.
- Asesu effaith y rhwystrau hyn trwy edrych ar ystadegau addysg o Bacistan.
- Ysgrifennu adroddiad neu lunio cyflwyniad, gan flaenoriaethu'r camau y mae angen eu cymryd i wella mynediad i addysg ym Mhacistan.

Adnoddau

- [Fideo: Dunya Aur Larki \("The World and the Girl"\)](#) (4 munud 8 eiliad)
- Taflen Gweithgaredd: Ystadegau addysg o Bacistan, wedi'u llungopïo a'u torri'n eu hanner (un hanner taflen i bob person ifanc)

Yr amser sy'n ofynnol: 60 munud

Mae Pacistan yn wynebu heriau difrifol wrth ddarparu addysg i'w holl blant. Mae ystadegau diweddar yn awgrymu nad yw 7.3 miliwn, neu un o bob tri, o blant Pacistan yn mynychu'r ysgol.

Cyflwyniad: Beth sy'n atal merched rhag mynd i'r ysgol? (20 munud)

- Dechreuwch trwy drwy ddangos y ffilm animeiddiedig *Dunya Aur Larki* ("The World and the Girl"). Gofynnwch i'r bobl ifanc nodi a rhestru'r holl rwystrau a wynebir gan y ferch wrth iddi geisio cael lle mewn ysgol.
- Gofynnwch i'r bobl ifanc rannu eu syniadau. Efallai y byddant yn disgrifio'r rhwystrau hyn mewn termau gwahanol, ond dylai'r rhestr gynnwys y canlynol:
 - Stereoteipio merched ar sail rhyw; mae hyn yn tarddu o henuriaid sy'n ddyinion, ond caiff ei weithredu i ddechrau gan y fam.
 - Merched yn cael eu cadw gartref ac yn cael tasgau i'w gwneud (cyfyngder cymdeithasol).
 - Pellteroedd hir rhwng y cartref a'r ysgol.
 - Diffyg mynediad i gludiant cyhoeddus, yn enwedig ar gyfer teuluoedd tlawd.
 - Trais a gwrthdaro yn dinistrio ysgolion (oherwydd gwladwriaeth fregus).¹
 - Trychinebau naturiol (er enghraifft, llifogydd) yn dinistrio ysgolion.
 - "Herio Efa" ("Eve-teasing") (aflonyddu rhywiol) ar y stryd.²
 - Seilwaith ysgolion gwael: mae diffyg ystafelloedd dosbarth a chyfleusterau mewn ysgolion.
 - Diffyg offer.
 - Diffyg dŵr a glanweithdra.
 - Mae'r gyllideb addysg genedlaethol yn isel o'i chymharu â chyllidebau eraill.

¹ "A fragile state is a low-income country characterised by weak state capacity and/or weak state legitimacy, leaving citizens vulnerable to a range of shocks" (Wikipedia).

² Term a ddefnyddir yn Ne Asia i ddynodi "the making of unwanted sexual remarks or advances by a man to a woman [or girl] in a public place" (Oxford Living Dictionaries: <https://en.oxforddictionaries.com/>).

- Anghydraddoldeb.
- Gofynnwch i'r bobl ifanc rannu'r rhestr yn ddau grŵp:
 - Rhwystrau i addysg sy'n effeithio ar ferched.
 - Rhwystrau i addysg sy'n effeithio ar fechgyn a merched.
- Arweiniwch drafodaeth ddosbarth am syniadau'r bobl ifanc. Efallai y bydd eu hymatebion yn eithaf cynnil, felly ceisiwch eu hannog i ymhelaethu yn ystod y drafodaeth. Er enghraifft, mae stereoteipio merched ar sail rhyw yn effeithio ar ferched yn unig. Mewn cymhariaeth, gall diffyg dŵr a glanweithdra mewn ysgolion effeithio ar ferched mewn modd anghymesur am eu bod yn cael mislif, ond mae hefyd yn effeithio ar fechgyn i ryw raddau. Fodd bynnag, mae athro heb offer yn effeithio ar fechgyn a merched fwy neu lai yn yr un modd.

Sut y gellid gwella mynediad i addysg ym Mhacistan? (30 munud)

- Rhowch gopi o'r daflen gweithgaredd sy'n dangos ystadegau addysg Pacistan i bob person ifanc. Rhestrir yr ystadegau ddwywaith ar y daflen, fel y gallwch arbed papur trwy dorri neu rwygo'r taflenni a lungopiwyd yn eu hanner. Trafodwch i ba raddau y mae cynnwys y ffilm yn cael ei gefnogi neu ei adlewyrchu yn yr ystadegau. A ellir defnyddio'r ystadegau i gefnogi unrhyw faterion a godwyd yn y ffilm, neu i'r gwrthwyneb? Cyfatebwch yr ystadegau perthnasol â'r rhestr o rwystrau i addysg.
- Rhannwch y dosbarth yn grwpiau o dri neu bedwar. Dywedwch wrth y bobl ifanc am gael trafodaeth fer am sut y gellid gwella mynediad i addysg ym Mhacistan, a phenderfynu ar y pum ffordd orau o gyflawni hyn. Yna, dylent ysgrifennu adroddiad byr neu wneud cyflwyniad i egluro'r blaenoriaethau hyn. Efallai y byddant yn gwahaniaethu rhwng y mesurau i'w cymryd gan lywodraeth Pacistan, gan ei chymdeithas sifil, a chan ei rhoddwyr. Eglurwch rolau'r cyrff hyn iddynt, gan ddefnyddio'r wybodaeth yn y tabl isod.

Llywodraeth Pacistan	Mae gan y llywodraeth gyfrifoldeb cyffredinol am yr hyn sy'n digwydd o fewn ffiniau'r wlad: mae'n casglu trethi, yn penderfynu ar wariant y llywodraeth, yn buddsoddi mewn gwasanaethau cyhoeddus (er enghraifft trwy adeiladu ysgolion a hyfforddi athrawon) ac yn gweithredu'r gyfraith. Fodd bynnag, mae trais a gwrthdaro yn lleihau effeithiolrwydd y llywodraeth, a chyfeirir at Bacistan yn aml fel "gwladwriaeth fregus".
Cymdeithas sifil Pacistan	Mae'r term hwn yn cynnwys dinasyddion sy'n gweithio gyda'i gilydd i wneud gwahaniaeth; er enghraifft, ymgyrchoedd ar lawr gwlad dros well addysg, ymgyrchoedd dros hawliau merched a menywod, neu gymorth cymunedol ar gyfer ysgolion ac athrawon (cymdeithasau rhieni-athrawon, cyrff codi arian, dosbarthiadau atodol, ac ati).
Rhoddwyr Pacistan	Gwledydd cyfoethog sydd â rhaglenni cymorth yw'r rhain. Maent yn darparu arian ychwanegol i'r Weinyddiaeth Addysg, yn rhoi arian i gyrff anllywodraethol sydd â rhaglenni addysg, ac yn targedu grwpiau penodol ar gyfer cymorth – er enghraifft, merched neu blant o ardaloedd gwledig.

Gall y mater yn ymwneud â rôl **rhoddwyr** a **chymorth datblygu rhyngwladol** godi. Yn achos Pacistan, mae hwn yn gwestiwn anodd a chymhleth. Mae Pacistan, a llawer o wledydd eraill, yn gwario ymhell islaw targed y Cenedloedd Unedig o 6% o CMC ar addysg. Mae'r targed hwn yn awgrymu bod y gwledydd hyn yn gallu fforddio gwario cyfran fwy o lawer o'u hincwm cenedlaethol ar addysg, ond eu bod yn penderfynu peidio â gwneud â hynny. Felly, a ddylai rhoddwyr ymyrryd o dan yr amgylchiadau hyn a darparu cymorth ar gyfer addysg? Gallai'r union ateb i'r cwestiwn hwn ddibynnu ar amrywiaeth o ffactorau y tu hwnt i gwmpas yr adnodd hwn, ac yn ymwneud â natur fregus gwladwriaeth Pacistan, ond mae'r cwestiwn cyffredinol yn werth ei drafod.

- Gofynnwch i un neu ddau o grwpiau (mwy os bydd amser yn caniatáu) roi eu cyflwyniadau neu ddarllen eu hadroddiadau i'r dosbarth.
- Dewch â'r dosbarth ynghyd i drafod y cyflwyniadau.
 - I ba raddau y maent yn cytuno o ran yr hyn y dylai'r blaenoriaethau fod?
 - Pa mor gymhleth yw'r her o ddarparu addysg i bawb?
 - A yw addysg i bawb dim ond yn golygu gwario mwy o arian ar ysgolion, neu a yw llwyddiant hefyd yn dibynnu ar newid cymdeithasol ehangach?
 - Sut y mae newid yn digwydd?

Trafodaeth sesiwn lawn (5-10 munud)

- A yw'r bobl ifanc yn credu bod unrhyw reswm pam y mae'r ffilm wedi cael ei galw yn "The World and the Girl"? Er enghraifft, gallai fod wedi cael ei galw yn "School and the Girl". A yw'r teitl yn dweud unrhyw beth am y rhwystrau i addysg a sut i'w goresgyn?

Pwyntiau i'w trafod:

- Mae yna rwystrau cymdeithasol i addysg merched – er enghraifft, aflonyddu rhywiol ac agweddau at hawliau merched, neu'r flaenoriaeth sy'n cael ei rhoi i addysg bechgyn. Mae'r rhwystrau i addysg yn mynd tu hwnt i'r prinder ystafelloedd dosbarth ac athrawon.
- Hefyd, mae'r amgylchedd gwleidyddol weithiau'n elyniaethus at addysg, ac yn cynnwys gwrthdaro, trais ac ansicrwydd. Sut y gall "gwladwriaeth fregus" ddarparu addysg i bawb?
- Felly, mae goresgyn rhwystrau yn golygu mwy na darparu lleoedd mewn ysgolion, gwerslyfrau ac athrawon. Mae angen newidiadau cymdeithasol a gwleidyddol mwy.

Telerau defnyddio

Hawlfraint © Oxfam GB

Gallwch ddefnyddio lluniau a gwybodaeth gysylltiedig yn yr adnodd hwn i ddibenion addysgol yn eich sefydliad addysgol. Bob tro y byddwch yn eu defnyddio, rhaid i chi gydnabod y ffotograffydd sy'n cael ei enwi ar gyfer y ddelwedd honno, ynghyd ag Oxfam. Ni chewch ddefnyddio'r delweddau na'r wybodaeth gysylltiedig i ddibenion masnachol, nac y tu allan i'ch sefydliad addysgol. Mae'r holl wybodaeth sy'n gysylltiedig â'r delweddau hyn yn berthnasol i'r dyddiad a'r adeg y cafodd y gwaith prosiect ei gylflawni.

Taflen Gweithgaredd**Ystadegau Addysg Pacistan**

Cyfanswm y boblogaeth:	196 miliwn
Nifer y plant nad ydynt yn mynychu'r ysgol gynradd:	7.3 miliwn (un o bob tri)
% y plant sy'n mynychu'r ysgol gynradd:	66%
% y disgyblion ysgol gynradd sy'n ferched:	44%
Nifer y myfyrwyr fesul athro:	41
Gwariant cyhoeddus ar addysg:	2% o'r CMC (targed y
Cenhedloedd Unedig yw 6%)	
Cyfradd cwblhau'r ysgol gynradd:	67%
Cyfradd cofrestru yn yr ysgol uwchradd:	37%

Ffynhonnell: www.sendmyfriend.org 2014

Ystadegau Addysg Pacistan

Cyfanswm y boblogaeth:	196 miliwn
Nifer y plant nad ydynt yn mynychu'r ysgol gynradd:	7.3 miliwn (un o bob tri)
% y plant sy'n mynychu'r ysgol gynradd:	66%
% y disgyblion ysgol gynradd sy'n ferched:	44%
Nifer y myfyrwyr fesul athro:	41
Gwariant cyhoeddus ar addysg:	2% o'r CMC (targed y
Cenhedloedd Unedig yw 6%)	
Cyfradd cwblhau'r ysgol gynradd:	67%
Cyfradd cofrestru yn yr ysgol uwchradd:	37%

Ffynhonnell: www.sendmyfriend.org 2014